



L'ENTREE DE TRES-

Reuerendissime Prince Messire
 Louys de Bourbon, Cardinal du
 Sainct Siege Apostolicque, Eues-
 que & Duc de Laon, Pair de Fran-
 ce, Archeuesque de Sens, Primat des
 Gaulles & Germanie: Faicte en la
 Ville & Eglise Metropolitaine de
 Sens, le Dimanche vingt quatriesme
 Ianuier, Mil cinq cents trante six.

PREMIEREMENT le
 Sammedy vingt-troi-
 sieme Ianuier sur les
 trois heures apres midy,
 Messieurs le Bailly de Sens Lieute-
 nant general, & Particulier, Preuost,
 Aduocat & Procureur du Roy &
 Procureur dud. sieur, aussi les Maire

Case

F

39

1326

1536e

& Escheuins avec plusieurs autres tous a cheual, partirent de Sés pour aller au deuant de Monsieur, qui estoit proche l'Abbaye Saint Iean les Sens, & apres auoir esté quelque temps en icelle Abbaye s'en alla à Saint Pierre le vif, & y coucha.

Et le l'ademain sur les huit heures du matin tout le Clergé alla processionnellement avec les Religieux de Sainte Colombe, & toutes les autres Abbayes, les Cordeliers, Iacobins, treize Prestres tous reuestus de riches Chappes, & estés partis de Saint Estienne allerent de cette façon en ladicte Abbaye de Saint Pierre, & y trouuerent mondict sieur, & au chœur d'icelle furent appelez à tour de Roolle tous les vassaulx des fiefs terres & Seigneuries dudit sieur pardeuant M^e. Guillaume Boucher, Bailly des terres & Sei-

gneuries temporelles dudit Arche-
uesché en sa presence, & combien
que plusieurs feissent default, ce
neantmoins comparurēt par Pro-
cureur ou autrement y comparurēt
comme vassaulx Ecclesiastiques,
Messieurs l'Archidiacre de Sens, le
Tresorier, l'Archediacre de Gasti-
nois, l'Archidiacre de Melun, l'Ar-
chidiacre de prouins, l'Archidiacre
d'Estempes, les Doyens Chanoines
& Chapitre de Sēs, les Religieux Ab-
bé & Conuent dudit Sainct Pierre
le vif, l'Abbé excuse, le Chappelain
de villefolle & les Celestins de Sens.

Ce faict mondict Seigneur estāt
assis en vne chaire au milieu du
chœur de ladicte Abbaye. S'adres-
ferent à luy Messieurs l'Archidiacre
de Sens & Tresorier par l'organe du-
quel Tresorier fut faicte vne haran-
gue en latin, pour & au nom de tout

le Clergé, par laquelle entre autres choses fut reCOMMANDÉ audit Seigneur sa foy, laquelle auoit par ses predecesseurs esté gardee & augmentee en ladicte ville & Diocese, dés le viuant de Monsieur Sainct Pierre, duquel Monsieur Sainct Sauinian premier Archeuesque de Sēs estoit disciple. Ladicte charge finie, ledict Seigneur s'estant vestu de sa Chappe de camelot rouge, & chapeau rouge la croix deuât luy fut esleué en lad. chaire par les Religieux de ladicte Abbaye & porté iusques à la grande porte d'icelle Abbaye.

Auquel lieu se trouuerent lesdits Vassaulx d'une partie desquels il fut porté iusques en l'Eglise saint Estienne de Sens, Apres ledict sieur estoient à cheual, Messieurs les enfãs de Vendosme nepueux dudit sieur, les enfans de la maison de Chastilló,

5
les Euesques de Chartres, Troyes, &
Aucerre avec leur Rocquets mon-
tez sur mulles, & les cy-deuât sieurs
môtez en bel ordre sur cheuau d'Es-
pagne parez d'une mesme liuree.

Marcherent au pres d'iceluy, tous
ces domestiques à pied.

Après ce marcherent les Abbez
de Saint Iean, Pontigny, de Cha-
steaulandon & de Fontaine Iean.

Après Monsieur le Bailly de Sens
& gens du Roy, ensemble tout le re-
ste du peuple & en gros nombre.

Depuis la porte nostre Dame
iusques à Saint Estiene pardeuât
Saint Pierre le Donjon les ruës e-
stoient tendues de Rouge.

Et quand ledict sieur fust arriué
deuant la grande porte qu'il trouua
fermee s'adressa à luy Monsieur de
Salezard grand Archidiacre de Sés,
qui luy fist vne autre harangue, &

luy fit faire le serment en tel cas requis & accoustumé.

Puis Monsieur le Prechantre luy presêta vne petite cordelette, qui estoit attachee à vne petite clochette au dessus dudiect portail, laquelle il sonna par trois fois, auquel fust demandé son nom, & quel il estoit, & apres responce par luy faicte, & toutes les ceremonies par luy faictes en tel cas, entra dans le cœur de ladite Eglise.

L'entree de la porte duquel cœur fust refusee par Messieurs du Chapitre à l'Euesque d'Aucerre, par ce qu'il portoit vne grād barbe neantmoins apres la Matiere débattue il entra, & ce meit au rang des Gentils-hommes, & n'approcha point du grand autel.

Et apres l'Oraison & priere faicte par mondiect sieur, il entra au tresor

pour se reuestir de ses habits ponti-
ficaux, avec lesquels il celebra la
grande Messe du Sainct Esprit so-
lemnelllement, & Monsieur de
Chartres feist le Diacre, Monsieur
de Troyes le Soubs-diacre, entrans
par la grande porte du chœur leurs
Croces marchoient deuant iceux, &
apres suiuoit mondict sieur deuant
lequel on portoit la Croix & Croce,
estoint tous trois Mitrez: Apres
laquelle messe fut faict vn solem-
nel banquet dedans la grande salle
du Pallais.

F I N.

